

అపొస్తుడు ఆతి పవులు తెస్సలోణిక పట్నమ్ది దేవుణు సజమ్జ్ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెసలోనిక పట్నమ్దు మని దేవుణు సజమ్ది వరిజ్ రాస్తి మొదోహి ఉత్తం. పవులు కొరింతు పట్నమ్దు మహివలె బాణిజ్ యా ఉత్తం రస్తపోక్తాన్ ఇజి నండొండార్ ఒడొబిజినార్. తిమోతి, సిల ఇనికార్ యా ఉత్తం ఒత్త సిత్తార్ ఇజి నండొండార్ ఒడొబిజినార్. పవులుని వన్ని వెట సువార్త పణి కినికార్ కూడొబి దెసలోనిక పట్నమ్దు సొన్ని సువార్త సాటిసి దేవుణు సజం మొదోల్స్త మనాద్. (అపొస్తురు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్తెజ్ మొదోల్స్తాన్. ఒక్కి మనికార్ ఆతి యూదురు ఆఇకార్బా నండొండార్ బాన్ కూడ్డి వాజి దేవుణుదిజ్ పొగ్డిబి మాడిసి మహార్. అందెజ్ దెసలోనిక పట్నమ్దు మని సెగొండార్ యూదురుని యూదురు ఆఇకార్, పవులు సాటిస్తెమని సువార్త నమ్మితార్. యూదురిజ్ ఇంక యూదురు ఆఇకార్ నండొండార్ సువార్త నమ్మితార్. ఇంజుముంజు మూండ్రి వారమ్కు బాన్ మహండ్రె వాండ్రు బాణిజ్ సొత సొహాన్. కొత్తాన్ దేవుణుదిజ్ నమ్మితి వరిజ్ హిమ్సెజ్ కినార్లెసు ఇజి వరిజ్ దయరం వెహైజ్ ఇజి బాన్ తిమోతిజ్ పోక్తాన్. మరి వెనుక దేవుణు సజమ్ది వరిజ్ దయరం వెహైజ్ ఇజి, మరి దేవుణుదిజ్ నమ్మితికార్ దేవుణుదిజ్ తియోలాజి ఎలాగ బత్కిదెజ్, మరి బండెజ్ ఆవిండ, మహికార్ గవరం సీనిలెకెండ ఎలాగ బత్కిదెజ్ ఇజి నెస్పిస్తెజ్ ఇజి యా ఉత్తం వరిజ్ రాస్తాన్. నండొండార్ యేసుప్రబు మర్జివాని దన్ని వందిజ్ అనుమానమాతార్. దన్ని వందిజ్ వరిజ్ నెస్పిస్తెజ్ ఇజి యా

ఉత్తం రాస్తాన్. యేసుప్రబు మర్జివాని వందిజ్ విజు అద్యయమ్కు రాస్త మనాద్.*

1 బుబ్బాతి దేవుణుదిజ్ దేవుణుదిజ్ని, ప్రబు ఆతి యేసుక్రీస్తుజ్ సెందితి మన్ని, తెస్సలొనిక పట్టమ్దు మని దేవుణు సజమ్ది వరిజ్, పవులుని సిలువాను తిమోతి ఇనికార్ రాసిని ఉత్తం. దేవుణు దయాదర్మమ్దాన్ మీరు నిపాతిదాన్ మండ్రెజ్ సయం కిపిన్.

తెస్సలొనికాది వరి నమకం వందిజ్ దేవుణుదిజ్ సమదనమ్కు!

2 ఎస్తివలెబా మా పార్లనమ్దు మిజి ఎత్తు కిజి, మీరు విజిదెరె వందిజ్ మాపు దేవుణుదిజ్ వందనమ్కు వెహ్సినాప్.

3 మిజి దేవుణు ముస్సు, మని నమ్మకమ్దాన్ మీరు కితి పణిజ వందిజ్, మహి వరి వందిజ్ ప్రేమదాన్ మీరు కష్టబాడేజిని దన్ని వందిజ్, ప్రబు ఆతి యేసు క్రీస్తు ముస్సు, మని ఆసదాన్ ఎద్రు సుడేజి డిస్ ఏండ ఓరిసిని ఓర్పు వందిజ్ మాపు ఎస్తివలెబా మా బుబాతి దేవుణు ముందాల ఎత్తు కిజి మంజినాప్.

4 తంబెరిజాండె, దేవుణు మిజి ప్రేమిస్తాండ్రె ఎర్లిస్త మనాన్ ఇజి మాపు నెస్నాప్.

5 ఎందనిజ్ ఇహిజ, మాపు మిజి వెహ్తి సువార్త, వహి మాటెజాణిజ్నే ఆఏండ, దేవుణు సత్తుదాన్, దేవుణు ఆత్మదాన్ మరి మా మస్సుదు పూర్తి నమ్మకమ్దాన్ మిజి నెస్తిస్తాప్. మీ వందిజ్ మాపు మీ వెట కూడేజి ఎలాగ బత్తితాప్ ఇజి మీరు నెసినిదెర్.

6 గొప్ప పెరి కష్టమ్దు మీరు ప్రబుజ్ని మిజి పొలిసి నడితిదెర్. గొప్ప పెరి కష్టమ్కు మిజి వాతె. గాని దేవుణు ఆత్మ మిజి సీతి సర్దదాన్ మీరు యా సువార్తదిజ్ డగ్రు కితిదెర్.

7 అందెజె అయాలెకెండ్ నమ్మిత్తికిదెర్ ఎలాగ మండ్రెజ్ ఇజి నెస్తిజ్ మాసిదోణియని అకాయ ఇని ప్రాంతమ్కాజ్ నమ్మిత్తి వరిజ్ విజేరిజ్ మీరు ఉండ్రె గుర్తు లెకెండ్ ఆతిదెర్.

* 0: 1:0 1:8-10; 2:19-20; 3:13-18; 5:23-24

8 మాసిదోణియని అకాయ ప్రాంతమ్కాజ్నె ఆవండ దేవుణు సువార్త మీ బాణిజ్ విజుబాన్ సాటె ఆతాద్. అక్కాదె ఆవండ దేవుణు ముస్సు మిజి మని నమకం విజేరె నెస్తార్. అందెజె దని వందిజ్మాపు ఇనికబా వెప్తాజ్ అకర్ సిల్లెద్.

9-10 ఎండనిజ్ ఇహిజ మీరు ఎలాగ మజి డగ్రు కితిదెర్ ఇజి వారె వెస్సినార్. బొమ్మెజి మాడిస్సిక డిసి,సిజి బత్తిజిని నిజమాతి దేవుణుదిజ్ పొగ్డిజి మాడిస్సెజ్ మీరు ఎలాగ దేవుణు దరోటు మప్తిదెర్ ఇజి వారె వెస్సినార్. బత్తిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోపమ్దాన్ మజి తప్తిసినికాన్ నాతి, సాతివరి బాణిజ్ దేవుణు నిక్తిమని వన్ని మరిన్ ఆతి యేసు, దేవుణు పరలోకమ్దాన్ డిగ్జి వానాన్లె ఇజి వన్ని వందిజ్ ఆసదాన్ ఎద్రు సుడేజి మంజినిదేర్.

2

దెసలొనిక పట్టమ్దు పవులు కితి సువార్త పణి

1 తంబెరిజాండె, మాపు మీ డగ్రు వాతిక పణిదిజ్ రెఎండ ఆవితాద్, ఇజి మీరె నెసినిదెర్.

2 ముజాల పిలిపియా పట్టమ్దు మజి ఎసా కస్టమ్కు వాతె, మరి ఎసానో సిగు కిత్తార్ ఇజి మీరు నెసినిదెర్. గాని గొప్ప గటిదాన్ అడ్డుజ్ వాతిజ్బాగాని దేవుణు మజి సితి దయ్ రమ్దాన్ సువార్త మాపు మిజి వెప్తాజ్ ఇజి మీరు నెసినిదెర్.

3 మా మన్సుదు ఇనికాదొ సెఇ ఉదేసమ్దానో, మజి ఇనికాదొ లాబం దొహ్కెజ్ ఇజినో, మిజి మోసెం కిదెజ్ ఇజినో మాపు యా సువార్త మిజి వెహ్ఎతాప్.

4 గాని అక్కాదె ఆవండ మాపు తగ్గికాప్ ఇజి దేవుణు మజి సుడేజి సువార్త వెప్తాజ్ ఇజి ఒపజెప్తి వందిజ్ మాపు వర్గిజినాప్. అందెజె మాపు లోకురిజ్ సర్గ కిబిస్సికార్ అవండ, మా మన్సుజ పరిక్కు కిజిని దేవుణుదిజ్నె సర్గ కిబిస్సికార్ అదెజ్ ఇజి సుడేజినాప్.

5 మాపు మిజి వెప్టికెజ్ ఇనికెజ్ బా పొజిజిని మాటెజ్ ఆఉ ఇజి మీరు నెసినిదెర్. మరి మజి డబ్బు వందిజ్ నండొ ఆస మనాద్ ఇజి మీరు నెన్ఎండ, మీ బాణిజ్ ఇనికబా గణస్తెజ్ ఇజి మాపు ఇనికబా డాఃప్పి వర్గివెతాప్ ఇనిదన్నిజ్ దేవుణునె సాక్కి.

6 లోకుర్ మజి పొగ్డిడెజ్ ఇజి మాపు కోర్వెతాప్. మీరు గాని మహికార్ ఎయెర్బాగాని మజి పొగ్డిడెజ్ ఇజి మాపు కోర్వెతాప్. మాపు క్రిస్తు వందిజ్ అపొస్తురు ఆతికాప్ ఇజి మీబాణిజ్ లొసె ఆదెజ్ అక్కు మన్నికాప్.

7 గాని అయాలెకెండ కిఎండ, ఉండ్రీ అయ్సి దని కొడొరిజ్ ఎలాగ సుడొజినాదొ, అయాలెకెండెనె మాపు మీ నడిమి తగె ఆత మహాప్.

8 మీరు మజి నండొ ఇన్టం ఆతికిదెర్. అందెజె మాపు గొప్ప సర్దాదాన్ మీ వెట దేవుణు సువార్త వెప్పికదె అవండ, మరి మీ వందిజ్ మా బత్తుదాన్ ఇనిక కిదెజ్ అట్టాపొ అక్కెజ్ కిదెజ్ బా తయార్ ఆత మహాప్. ఎందనిజ్ ఇహిజు మీరు మజి నసా డగ్రుహికిదెర్ ఆతిదెర్.

9 తంబెరిజాండె, మీ నడిమి సువార్త వెప్పి మహివలె, మాపు మీ ముస్కు ఆదారం అవండ, రెయు పొగొల్ కస్టబాడ్డి పణి కిజి మహాప్. మాపు కస్టబాడ్డి పణికితిక మరి మా కస్టమ్కు విజు మీరు తవ్వండ ఎత్తు కిజి మంజినిదెర్ ఇజి మాపు నెసినాప్.

10 దేవుణుదిజ్ నమ్మిత్తికిదెర్ ఆతి మీ నడిమి, మాపు ఎసా బక్కిదాన్, నీతి నిజాయితిదాన్, నిందెజ్ సిల్లెండ ఎలాగ బత్తితాప్ ఇని దనిజ్ మిరె సాక్కి, దేవుణుబా సాక్కి.

11-12 ఎందనిజ్ ఇహిజు. వన్ని గొప్ప జాయ్దుని, వన్ని ఏలుబడిదు మండ్రెజ్ ఇజి మిజి కూక్కి మని దేవుణుదిజ్ తగితి లెకెండ మీరు బత్తిదెజ్ ఇజి మిజి ఒరెన్ అప్పొసి వన్ని కొడొర్ వెట ఎలాగ వెప్పి నెగ్గి సర్దు నడిపిసింద్రొ, అయ లెకెండె మీ లొఇ ప్రతి ఒరెన్ వన్నిజ్ ఉసార్ కిజి, దయరం వెప్పి, బతిమాలజి మాపు మీ వెట మహాప్ ఇజిబా మీరు నెస్సిదెర్.

13 మాపు దేవుణుదిజ్ ఎస్తివలెబా డిన్ఎండ వందనమ్కు కిజినె మంజినాప్. ఎందనిజ్ ఇహిజు మా బాణిజ్ మీరు వెహి మని దేవుణు

మాట, అక్క లోకుర్ బాణిజ్ వాతి మాట లెకెండ్ర్ ఆవిండ, అక నిజం మని లెకెండ్ర్, దేవుణు బాణిజ్ వాతి దేవుణు మాట లెకెండ్ర్ మీరు డగ్రు కితిదెర్. అందెజె దేవుణుదిజ్ నమ్మిత్తికిదెర్ ఆతి మీ మన్నుదు అక్క నెగ్గి పణి కిజినాద్.

14 తంబెరిజాండె మీరు యూదయ దేసమ్దు మని క్రీస్తు యేసుజ్ నమ్మిత్తి మని దేవుణు సజమ్కాణి వరిజ్ పొలిసి నడిసినిదెర్. ఎందనిజ్ ఇహిజ, వారు వరి సొంత లోకుర్ ఆతి యూదురు బాణిజ్ స్రమెజ్ ఒరిస్తి మహి లెకెండ్ర్ మీరుబా మీ సొంత లోకుర్ బాణిజ్ స్రమెజ్ ఒరిస్తిదెర్.

15 యూదురు ఆతికార్ ప్రబు ఆతి యేసుజ్ని దేవుణు ప్రవక్తరుజ సప్తార్. వారు మజిబా డిన్విండ హిమ్మెజ్ కిత్తార్. యూదురు ఆకకార్ సువార్త వీంజె దేవుణు వరిజ్ రక్సిస్సెజ్ అఎద్ ఇజి మాపు వరి వెట వర్గివిండ మజి అడు కిజి దేవుణుదిజ్ పడిఱ పణిజ్ కిజి వారు లోకుర్ విజెరిజ్ పగాతికార్ ఆజినార్.

16 యా లెకెండ్ర్ వారు వరి పాపమ్కు మున్ను మరి కుడుప్పి పూర్తి కిజినార్. అందెజె కడివేరిదు దేవుణు కోపం వరి మున్ను మనాద్.

తెస్సలొనికది వరిజ్ సుడెడెజ్ పవులుజ్ మని గొప్ప ఆస

17 తంబెరిజాండె, మాపు సెగం కాలం మీ బాణిజ్ దూరం ఆతి మనిజ్ (మా ఒడొల్నె దూరం ఆతాద్ గాని మా మన్ను దూరం అవతాద్) మర్జి మీ డగ్రు వాజి మిజి సుడెడెజ్ ఇజి నండొ ఆస ఆజి నండొ పణి కిత్తాప్.

18 నిజమె, మీ డగ్రు వాదెజ్ ఇజి గొప్ప ఆస ఆతాప్గాని నయ్తాను దనిజ్ అడ్డు కిత్తాన్. పవులు ఇని నాను మరి మరి మీ డగ్రు వాదెజ్ ఇజి సుడెఱత.

19 మాపు ఎయెర్ వందిజ్ దేవుణు ఎద్దు ఆసదాన్ ఎద్దు సుడెజినాప్? మజి సర్ల కిబిస్సికార్ ఎయెర్? సిల్లిజ ఎస్తివలెబా మాపు యేసుక్రీస్తు ఎద్దు పొగిడిఱి, మజి గొప్ప సర్ల కల్గిసిని ఉండ్ర్ టోపి లెకెండ్ర్ మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎద్దు మంజిని మీరెగదె?.

20 నిజమె మీరె మజి నెగ్గి పేరు తపిసినికిదేర్. మజి నర్ద కిబిసినికిదేర్ మీరె.

3

1 మిజి సుడోదెజ్ ఇజి మజి మని ఆస బరిస్తెజ్ అట్ ఏండాతిజ్, మాపు ఏదెన్సు ఇని పట్టుమ్దు మంజినిక నెగ్గిక ఇజి ఒడిబిజినె,

2 యేసుక్రీస్తు ముస్సు మీరు ఇడ్డి నమకమ్దు కద్దిఎండ మిజి దయరం వెప్పి, సత్తు మని వరి లెకెండ్ ముజాల నడిపిస్తెజ్ ఇజి యేసుక్రీస్తు వందిజ్ సువార్త సాటిస్తెజ్ మా వెట కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్గు పోక్టాప్.

3 అందెజె మీ లోఇ ఎయెన్బా యా కస్టమ్కాజ్ సుడోజి వెనుక సాన్ ఎండ, యేసుక్రీస్తు ముస్సు మని నమకమ్దు గటిజ నిల్పి మండ్రెజ్ వలె. ఎందనిజ్ ఇహిజ మాటు యాకెజ్ ఓరిస్తెజ్ వలె ఇజి మీరు నెసినిదేర్.

4 నిజమె, మాపు మీ వెట మహివలెనె మజి హిమ్మెజ్ వానె ఇజి మిజి వెప్పి మహాప్. యాకెజ్ మాపు వెహితి లెకెండ్ నె జర్గితె ఇజి మీరు నెసినిదేర్.

5 ఎలాగబా సయ్యాను సెఇ పణిజ్ కిదెజ్ ఇజి మీ మన్నుదు ఆస పుటిసి, మీ నడిమి మాపు కితి పణిజ్ విజు ఉండ్రె వేల పణిదిజ్ రెవండ కిత్తాను ఇజి నాను తియెలాత. అందెజె దన్ని వందిజ్ ఎత్తు కిజి, యాక ఓరిస్తెజ్ అట్ ఏండా మీ నమకం వందిజ్ నెస్తెజ్ ఇజి నాను తిమోతిజ్ పోక్టా.

తిమోతి తతి నెగ్గి కబ్బు

6 గాని తిమోతి మీ బాణిజ్ ఏలె మా డగ్గు వాతాన్. మిజి దేవుణు ముస్సు మని నమకం వందిజ్, మీ ప్రేమ వందిజ్ నెగ్గి కబ్బు తతాన్. మాపు మిజి సుడోదెజ్ ఆస ఆజిని లెకెండ్, మీరుబా మజి సుడోదెజ్ ఆస ఆజినిదేర్ ఇజి వాండ్రు వెప్తాన్. మరి మా వందిజ్ ఎస్తివలెబా సర్దాదాన్ ఎత్తు కిజినిదేర్గె.

7 అందెజె తంబెరిజాండె, మాపు మిజి వాతి దుకమ్దాన్ మహివలె, మిజి హిమ్మెజ్ వాతివలె మీ నమకం వందిజ్ విహాపె ఉసార్ కిబె ఆత్వాప్.

8 మీరు ప్రబు ముస్కు మని నమకమ్దు గటిజ నిల్పి మంజినిదెర్, అందెజె దేవుణు ముస్కు మిజి మని నమకం మా బత్కు లెకెండెనె మిజి విలువాతిక ఆజినాద్.

9 దేవుణు ముందాల మీ వందిజ్ మన్ని విజు సర్ల వందిజ్ దేవుణుదిజ్ వందనమ్కు ఎసొ వెహ్తాజ సరి ఆనాద్? ఎస్సొ మాపు వెహ్తాజ్బా అక్క తక్కునె మంజినె.

10 మాపు మిజి మరి ఉండ్రీ సుటు సుడఃజి దేవుణు ముస్కు మని మీ నమకమ్దు మిజి తకు మనిక పూర్తి కిదెజ్ ఇజి ఉండ్రీ సుటు అవ్కాసం దోహ్క్తికెజ్ ఇజి రెయు పొకల్ దేవుణు వెట పార్దనమ్దు నండొ బతిమాలిజినాప్.

11 మా బుబ్బాతి దేవుణుని మా ప్రబువాతి యేసు మీ డగ్రు వాదెజ్, మిజి ఇని అడ్డు సిల్లెండ సరి తొరిసిన్.

12 మాపు మిజి ప్రేరెమిసిని లెకెండ మీరు ఒరెన్ మరి ఒరెన్ వెట ప్రేమిస్తెజ్, మరి మీ లొఇ మని ప్రేమ నండొ అజి పొగిజిని లెకెండ ప్రబు మిజి సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎద్రు మీరు ఇని కరయి సిల్లెండ, నీతి నిజాయితిదాన్ మండ్రెజ్, మీ మన్సుదు దేవుణు మిజి సత్తు సిపిన్.

4

దేవుణుదిజ్ ఇస్టమాతి లెకెండ బత్కిని వందిజ్

1 తంబెరిజాండె, దేవుణుదిజ్ ఇస్టం ఆతివజ ఎలాగ బత్కిదెజ్ ఇజి మాపు మిజి నెస్పిస్త మనాప్. మీరు అయాలెకెండెనె కిజినిదెర్. గాని అక్కర్దిజ్, మాపు మిజి యేసుప్రబు పేరుదాన్ గటిజ సారిసి సారిసి వెహ్సానిక ఇనిక ఇహిజ మీరు అయ లెకెండ మరి ఒదె నెగెణ్ కిజి మండ్రు.

2 యేసువ్రబు బాణిజ్ మజి దోహ్కొక్తి అతికారమ్దాన్ మాపు మిజి నెస్సిస్తికెజ్ ఇనికెజ్ ఇజి మీరు నెసినిదెర్.

3 మీరు దేవుణు వందిజ్ ఒప్పుజెప్పి వన్ని వందిజ్ కేట ఆతికార్ ఆజి మండ్రెజ్ ఇజినె దేవుణు ఇస్టమాజినాన్. మీరు రంకు బూలానిక ఆవెద్ ఇజినె దేవుణు కోరిజినాన్.

4 అక్కాదె ఆవండ దేవుణు మీ ఒడొల్దిజ్ మని ఆసదిజ్ సరి సివిండ, ఒరెన్ సొంత ఒడొల్దిజ్ ఇని పాపమ్దిజ్ సొన్విండ ఎలాగ తగితి లెకెండ్ దేవుణుదిజ్ ఇస్టమాతి వజ అడిదెజ్ ఇజి మీరు ఒరెన్ ఒరెన్ నెస్టెజ్ వలె.

5 మీరు, దేవుణుదిజ్ నెన్ఇ, దేవుణుదిజ్ నమ్మిఇ వరిలెకెండ్, ఉత్పుత్ ఆజి మండ్రెజ్ ఆవద్.

6 ఎయెన్బా, ఉత్పుత్ ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడ్జి మంజి, వన్నిజ్ మొసెం కిదెజ్ ఆవద్. యా లెకెండ్ కిని వరిజ్ దేవుణు సిక్స సీనాన్. దిన్ని వందిజ్ మాపు ముజాల మీ వెట కసితం వెహ్టా మహాప్.

7 ఎండనిజ్ ఇహిజ. రంకు బూలాజి బత్కిదెజ్ ఇజి దేవుణు మజి కూక్తెజ్ సిల్లెన్, గాని పాపం సిలి నెగ్గి బత్కు బత్కిదెజ్ ఇజినె కూక్త మనాన్.

8 అందెజె యా బోదదిజ్ నెక్కి షొక్కికాన్, లోకుదిజ్ నెక్కి షొక్ఎన్ గాని దేవుణు ఆత్మదిజ్ మిజి సీజిని దేవుణుదిజ్నె నెక్కి షొక్కికాన్ ఆజినాన్.

9 తంబెరిజు నడిమి, ఒరెన్ వన్నిజ్ మరి ఒరెన్ వన్ని వెట మన్ని ప్రేమ ఎలాగ మండ్రెజ్ ఇజి, మాపు మిజి ఏలు రాస్తెజ్ అవ్సరం సిల్లెద్. ఒరెన్ మరి ఒరెన్ వన్నిజ్ ఎలాగ ప్రేమిసి మండ్రెజ్ ఇజి దేవుణునె మిజి నెస్సిస్త మనాన్.

10 నిజమె మాసిదొనియ ప్రాంతమ్దు మనిక తంబెరిజు విజేరిజ్ మీరు ప్రేమిసినిదెర్. గాని మీరు మరి ఒదె ప్రేమిసి మండ్రెజ్ ఇజి మాపు సారిసి సారిసి వెహ్సాన్.

11 మాపు ముజాలలె మిజి ఆడ్ర సిత్తిమహి లెకెండ్ సార్లిదాన్

బత్కిదెజ్ ఆస ఆజి మండ్రు. మరి మీ కికాణిజ్ మీ వందిజ్ పణి కిజి మండ్రు మహివరి సజతిజి లొఇ బుర డుఃత్వంండ, మీ పణిజ్ సుడఃజి మండ్రు.

12 నస్తవలె మీ బత్కు సడఃజి నమ్మిఇకార్ మిజి గవరం సీనార్. మరి మీరు, మహి వరి మున్కు ఇనిదని వందిజ్బా ఆదారం ఆవిండ మంజినిదెర్.

ప్రబు మర్జి వాని వందిజ్

13 తంబెరిజాండె, దేవుణు మున్కు నమకం ఇట్టి సాతివరిజ్ ఇనికా జర్గినాద్ లె ఇజి మీరునెసి మండ్రెజ్ ఇజి మాపు కోరిజినావ్. ఎండనిజ్ ఇహిజి దేవుణు ఎద్రు ఇని ఆస సిలి నమ్మిఇ వరి లెకెండ మీరు దుకం ఆవిండ మండ్రెజ్ వలె ఇజి మాపు కోరిజినావ్.

14 యేసుప్రబు సాతండ్రె మర్జి నిజితాన్ ఇజి మాటు నమ్మిజినాట్. అయలెకెండెనె యేసుప్రబు మున్కు నమ్మకం ఇడఃజి సాతివరిజ్బా దేవుణు యేసు వెట కూక్కు తనాన్.

15 అందెజె ప్రబు ఆతి యేసు వెప్పి మని మాట అసి మాపు మిజి దయరమ్దాన్ వెప్పినిక ఇనిక ఇహిజి, ఏలు బత్కిజిని మాటు, యేసు ప్రబు మర్జి వాని రోజు బత్కిజి మహిజ్బా, ప్రబు మున్కు నమకం ఇడఃజి సాతి వరిజ్ ఇంక ముజాల వన్ని డగ్రు సాండ్రెజ్ అట్వట్. వారె ముజాల సానార్లె.

16 ప్రబువాతి యేసుక్రీస్తు వన్ని గొప్పు పెరి జాటుదాన్ ఆడ్ర సీజి, విజు దాతారి మున్కు నెయ్కు ఆతి దూత జాటుదాన్, దేవుణుది గొప్పు పెరి జోడుఃబంగ ఊక్కి జాటుదాన్ పరలోకమ్దాన్ డిఃగ్గి వానివలె, యేసుప్రబు మున్కు నమకం ఇడఃజి సాతికార్ ముజాల నిజ్నారలె.

17 నస్తవలె బూమి మున్కు బత్కిజిని మాటు యేసుప్రబుజ్ దసుల్ ఆదెజ్ ఆకాసమ్దు మని మొసాపుదు వరివెట పెరి ఆనాట్లె. అయాలెకెండె మాటు ప్రబు వెట ఎలాకాలం మంజినాట్లె.

18 అందెజె మీరు యా మాటెజాణిజ్ ఒరెన్ మరి ఒరెన్ వన్ని వెట దయరం వెప్పి మండ్రు.

5

1 తంబెరిజాండె, ఎస్తివలె అక్కెజ్ విజు జర్గినాదలె ఇజి, ఆ గడియ వందిజ్నో, ఆకెజ్ ఎలాగ జర్గినె ఇని వందిజ్నో మాపు మిజి రాస్టెజ్ అవ్సరం సిల్లెద్.

2 ఎందనిజ్ ఇహిజు, ఎయెర్బా ఒడెబిఎండ మనివలె రెయ్కు, డొజ కిడెజ్ డొజారి ఎలాగ వానాండ్రో, అయా లెకెండెనె ప్రబు వాని దినంబా మంజినాద్ ఇజి మీరు బాగ నెసినిదెర్.

3 “సమదనమ్దాన్ మనాప్, మజి ఇని తియెల్ సిల్లె”, ఇజి లోకుర్ వర్గిజి మంజిని వలెనె, పొటాదు మన్ని బోదెలిదిజ్ ఎలాగ ఏరు ఈబాని నొప్పి వానాదొ, అయలెకెండెనె వెటనె నాసనం వరి ముస్సు. వానాద్లె. అందెజె ఎయెర్బా తప్తె ఆదెజ్ అట్వెర్.

4 తంబెరిజాండె, ఇనికబా ఒడెబిఎండ మనివలె, ఒరెన్ డొజారి లెకెండె అయా దినం మీ ముస్సు. వాతిజ్బా మీరు బమ్మ ఆఇదెర్. ఎందనిజ్ ఇహిజు, మీరు దిని వందిజ్ నెన్వండె సీకటిదు బత్తిని కిదెర్ ఆఇదెర్.

5 మీరు విజిదెరె జాయ్దు పుట్టి నని వరి లెకెండె మనిదెర్, వెడెదిజ్ పుట్టి నని వరి లెకెండె మన్నిదెర్. మాటు రెయ్కుదిజ్ పుట్టి నని వరి లెకెండె ఆవెట్.

6 అందెజె మాటు మహి వరి లెకెండె నిద్ర కిజి మన్వండె మా మన్సుదిజ్ అడిజి తెలిదాన్ మంజినాట్.

7 నిద్ర కినికార్ రెయ్కు నిద్ర కిజినార్. ఉణిజి సోస్సికార్ రెయ్కు సోసి మంజినార్.

8 మాటు వేలెదిజ్ పుట్టి నని వరి లెకెండె మనికాట్. అందెజె మాటు మా మన్సుదిజ్ అడ్డిజి, దేవుణు ముస్సు. మని నమకమ్ని ప్రేమ, మజి గుండెదిజ్ అడు కిని ఉండ్రీ ఇనుము సొక లెకెండె తొడుగినాట్. మరి దేవుణు మజి రక్సిస్సాన్లె ఇజి వన్ని వందిజ్ ఆసదాన్ ఎద్రు సుడెజి మంజినిక, మజి బురాదిజ్ అడు కిని ఇనుము టోపి లెకెండె తొడిగిజి మంజినాట్.

9 ఎందనిజ్ ఇహిజు, మా ప్రబువాతి యేసుక్రీస్తు మజి రక్సిస్టెజ్ ఇజినె దేవుణు మజి ఏర్పాటు కిత్తాన్. గాని వన్ని బాణిజ్ వాని సిక్కు వందిజ్

అవుద్.

10 మాటు బత్తితి మహిజ్బా, సాతి మహిజ్బా, వాండ్రు మర్జి వానివలె వన్నివెట మజి బత్తిసైజ్నె యేసుక్రీస్తు మా వందిజ్ సాతాన్.

11 అందెజె మీరు ఏలు కిజిని లెకెండెనె ఒరెన్ మరి ఒరెన్ వన్ని వెట దయరం వెహ్ని, ఒరెన్ వన్నిజ్ దేవుణు ముస్సు మని నమ్మకమ్దు పిరిని లెకెండె సాయం కిజి మండ్రు.

12 తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెహ్ని, మీ నడిమి కస్టబాడిజి దేవుణు పణి కిని వరిజ్ గవరం సీదు ఇజి మిజి బతిమాల్జినాప్.

13 వారు కిజిని పణి వందిజ్ వరిజ్ నండొ ప్రేమిసి గవరం సీజి మండ్రు. ఒరెన్ మరి ఒరెన్ వన్ని వెట నిపాతిదాన్ బత్తిజి మండ్రు.

14 తంబెరిజాండె, మాపు మిజి వెహ్నినిక ఇనిక ఇహిజు, బదకమ్దాన్ మని వరిజ్ మీరు బుద్ధి వెహ్తు. విసారం అస్తి మనివరిజ్ దయరం వెహ్ని మండ్రు. దేవుణు ముస్సు మని నమకమ్దు పిరిదెజ్ అట్టణ వరిజ్ సాయం కిజి మండ్రు. విజేరె వెట ఓరిసి మండ్రు.

15 ఎయెన్బా వన్ని వెట మరి ఒరెన్ కితి సెఇ పణిదిజ్ మర్జి సెఇ పణిజ్ కివిండ సుడొదు. ఎస్తివలెబా ఒరెన్ మరి ఒరెన్ వన్ని వెట కనికారమ్దాన్ మండ్రు. లోకుర్ విజెరె వెటబా కనికారమ్దాన్ మండ్రు.

16 ఎస్తివలెబా సర్దదాన్ మండ్రు.

17 డిన్విండ పార్దనం కిజి మండ్రు.

18 ఎలాగ మర్తి సమయమ్దుబా విజు దనిజ్ దేవుణుదిజ్ వందనమ్కు వెహ్ని మండ్రు. యేసుక్రీస్తుజ్ నమ్మిత్తి మని మీరు యాలెకెండె మండ్రెజ్ ఇజిని దేవుణు కొరిజినాన్.

19 మీ లోఇ మని దేవుణు ఆత్మదిజ్ నప్పాట్.

20 దేవుణు బాణిజ్ వాతి దేవుణు ప్రవక్తరు వెహ్తి మాటెజు నెక్కి పొక్కాట్.

21 విజు వనకాజ్ పరిస కిజి నెగ్గి దనిజ్ డగ్గు కిదు.

22 సెఇ విజు వన్కాజ్ దూరం కిదు.

23 నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎద్దు మీ దేవుణు ఆత్మాని, మీ పాణం, ఒణ్ణోల్ విజు ఇని నిందెజ్ సిల్లెండ దేవుణు కాపాడేజి మనీన్ ఇజి నాను పార్దనం కిజిన.

24 మిజి కూక్తి మని దేవుణు నమ్మకమాతికాన్. అందెజె వాండ్రు వెహ్లా లెకెండెనె కినాన్.

25 తంబెరిజాండె, మా వందిజ్ పార్దనం కిదు.

26 పూర్తి నెగ్గి మన్సుదాన్ పొంపిజి ముద్దు కిజి తంబెరిజ్ విజెరిజ్ వందనమ్కు వెహ్లు.

27 తంబెరిజ్ విజెరిజ్ యా ఉత్తం నద్వీజి వెన్పిన్దెజ్ ఇజి ప్రబువాతి యేసుక్రీస్తు పేరుదాన్ మిజి బతిమాలిజిన.

28 మా ప్రబువాతి యేసుక్రీస్తు దయాదర్మం మీ వెట మనీద్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c